

1 Tessalonika

Nalobulat napisulan na-v^{ha-sual-an} aPol totesi van hən alat a Tessalonika

Ase itos nalobulat napisulan egai?

APol itosi.

Itos nalobulat napisulan egai hən nəsa?

Itosi hən hikel mai alat siYesu len naut a Tessalonika nañide hən ləbigol aGot behəhañur.

Itos nalobulat egai mōs ase?

Nalobulat egai evi napisulan aPol totesi van hən alat siYesu len naut a Tessalonika.

APol itos nalobulat egai ñais mai len naut a be?

APol itosi pəpadañ hən nasihau A.D. 51 nəboñ totoh len naut a Korint.

1) Na-ke-ivoi-an (1.1)

2) Nasipaan vi təban aGot hən gamit məttodəlom na-kel-uri-an tovoi. Nohəhañur husur mətukad nadəlomian enan sal (1.2-3.13)

3) Nəmauran togol aGot tohəhañur (4.1-12)

4) Nəgəmaian siNasub (4.13-5.11)

5) Nakelean naməkot (5.12-24)

6) Nə-maris-kotovi-an (5.25-28)

Na-ke-ivoi-an

¹ Ginau aPol mai aSilas* mai aTimoti, namtutos nalobulat napisulan egai. Namtutosi van hən alat a Tessalonika, lotovi siGot mai siNasub, aYesu Kristo. AGot teviol kəmas hən navoian mai gamito, tigol nəlomit tikad natəñmat tabtab.†

* **1:1:** Len nasoruan ta Kris ike Silvanus, sake Silas, be evi naulurñan sua ñai. † **1:1:** *Silas:* Uman 15.22; *Timoti:* Uman 16.1; *Alat a Tessalonika:* Uman 17.1

Nasipaan tovi tēban aGot hən alat lotodəlom na-kel-uri-an tovoi

² Nəboŋ ƣisi namttosor husur gamito len na-sor-tuŵ-an sinamito, namtosipa vi tēban aGot tabtab.

³ Nəboŋ namttosor tuŵ len nəhon aGot aTəmadato, namtunau təlmam hən nauman samito hən nadəlomian, nauman samito hən na-ləmas-buni-an mai nə-daŋ-ŵuri-an məttoƣade bathut nəvatvat-viri-an len aMasta sidato, aYesu Kristo.*

⁴ Bathudud nadəlomian aGot toləmas bun gamit ƣisi, namtoləboii ke ilekis hən gamito hən mətŵevi esan.

⁵ Namtoləboii, husur na-kel-uri-an sinamito husur aYesu sagəm hən gamito len nasoran ŋai, be egəm len nədaŋan, egəm len aNunun aGot, egəm len na-ləboi-səhoti-an hən nakitinan. Mətoləboi naŵoruan namttokade nəboŋ namttotoh mai gamito. Namtutoh maienan hən namtŵevi tarhət samito.

⁶ Ale mətəsəsəloŋ səhot nasoruan len nakemkeman togəm len aNunun aGot, naut kəmas na-ləŋon-isa-masuŵ-an məttoƣade. Len naŵide tomaienan, mətugol tətəŵ hən ginamito mai mətugol tətəŵ hən Nasuŵ.*

⁷ Husur natenan, galit ƣisi lotokad nadəlomian len navile ƣisi len naprovens Masetonia mai aAkaia, loləboi ləŵeris gamito, gol tətəŵ hən gamito.‡

⁸ Husur nasoruan siNasuŵ evivile dan gamito, ikai van hən naut ƣisi a Masetonia mai aAkaia, ale na-kel-uri-an husur nadəlomian samit vi tēban aGot, ibar naut ƣisi, gol ke səƣad natideh am hən

* **1:3:** 1Kor 13.13 * **1:6:** Uman 17.5-9 ‡ **1:7:** Masetonia: 2Kor 1.16; Akaia: 2Kor 1.1

namtbikel husuri.

⁹ Alat galenan lukel husur nahəhaʋuran məttofade nəboŋ namttotoh mai gamito, lukel uri ke məttopair dan nəlablab gail van hən aGot nəkadun nəmauran, van hən aGot kitin hən mətbevi esan hum naslev.

¹⁰ Lukele am ke məttoth vir natəlmaman siYesu, aNatun aGot, aGot togol tole məhat dan nəmatan. Evi aYesu egaii bilav kuv gidato dan nabiltirol paŋpaŋ siGot beğəmai.

2

Nauman siPol len naut a Tessalonika

¹ Husur, bathudud nadəlomian, gamit gabag, mətələboii ke, natohan sinamit mai gamito, savi natohan kəmas ŋai. Ao, ikad naʋite.

² Mətələboii ke a mo, len naut a Filippi, lomədas masuʋ hən ginamito gol namtoləŋon isa vəsa, be aGot eviol hən na-il-ḥuri-an mai ginamito hən namtbikel na-kel-uri-an san tovoi mai gamito a Tessalonika, naut kəmas alat lotosobur lotomətahun ginamit len naut samito.*

³ Husur na-kel-uri-an sinamito sagəm len nəsaban. Len nəlonamit tomasil namtogəm hən namtbevi tarhət samito, nəgəgərasan eḥuer.

⁴ Be nəboŋ namttosor, namtusor hum ahai pispisul gail siGot, gai tosaḃi ke namttonor hən namtbikel na-kel-uri-an tovoi, ale erinji len navəlanamito. Imagenan namtusor, savi hən nəvanuan gail ləbehəhaʋur, be hən aGot, tokəta bunus ləboi nəlonamito, beḥəhaʋur.

* **2:2:** Uman 16.19-24, 17.1-9

⁵ Mətöləboii ke namtsasor hehe hən gamito, ale aGot eləboi bikel koti ke namtsəkad naləjonian təməhav ideh namttosusuani o gəras gamit həni.

⁶ Namtsaləjon nə-sal-suhi-an sinəvanuan, namtsaləjoni len gamito o avan ideh am.

⁷ Husur ke namttovi hai pispisul gail seKристо, len nəhes namttoṽati, inor hən məttaum tədaŋ hən mətəkətkəta təban ginamit tavoi. Be nəboŋ namttotoh ei, namtogəm suŋan namttovi ut kəmas ŋai len gamito. Ginamito, namtoləmas bun gamito hum anana sua tovəhasus, tokətkəta təban anatun gail len na-ləmas-buni-an.

⁸ Namtoləmas masuṽ hən gamito gol ke namttokatəpol hən na-kel-uri-an tovoi siGot mai gamito, səvi enan ŋai, be namtoviol hən ginamit gabag am mai gamito.

⁹ Bathudud nadəlomian, nau təlmam hən nauman todaŋ sinamito, tohaihai masuṽ. Len nalennəyal mai nalenmariug namtəum habat mōs nəvat, hən asike natohan sinamit bəməlas len gamito, nəboŋ namttokel ur na-kel-uri-an tovoi siGot mai gamito.

¹⁰ Gamit, məttohad nadəlomian, mətöləboi mət̃bikel koti ke, nəvide sinamit van hən gamito ikad naḃoruan siGot lan, nəvide sinamit inor, nəsaan eḃuer lan. AGot am eləboi bikel koti maienan.

¹¹ Mətöləboi nategai ke, nəvide namttokade mai gamito esuŋan nəvide atata ideh tokade mai anatun gail.

¹² Suŋan atata, akis namtsosor hən namtbəbur nəlomito, hən namtb̃igol mət̃beləjon bivoi am len nəlomito, ale len nəmauran samito, namtudaŋ hən mət̃bitoh b̃inor len naḃisal aGot b̃ehəhaṽur həni.

Husur evi aGot tokis gamito hən mət̃bevi esan len natohan pipihabəlan len nəyalyalan san.

¹³ Bathut nategai am, namtosipa vi təban aGot tabtab. Husur nəboŋ namttokel ur nasoruan siGot, mət̃osəsəloŋ səhoti, savi hum nasoruan sinəvanuan ŋai, be hum tovi nasoruan siGot. Evi nasoruan kitin siGot, ŋa len nasoruan enan san, aGot eum len gamit mət̃torin̄ nəlomit lan.

¹⁴ Bathudud nadəlomian, bathut nadəlomian samito, mət̃ogəm̄ p̄itoṽ hən alat siYesu Kristo len naut a Jutea. Alat len naut samito lomədas bun gamito hən mət̃beləŋon isa vəsə p̄itoṽ hən naJu galevis a Jutea lotomədas bun alat siYesu ei.*

¹⁵ Evi galit lotogol ahai kelkel ur gail ta sutuai lotomat, ale lugol Nasuḅ, aYesu am tomat. Lomədas masuṽ hən ginamito van lohut ginamito. Lugol aGot sahəhaṽur, ale lukad nəsasaan van hən nəvanuan p̄isi*

¹⁶ husur lotohisi hən ləb̄ip̄on gol ginamito hən asike namt̄bisor mai alat ləsavi Ju. Lugol imaienan hən alat ləsavi Ju asike ləb̄ikad nə-lav-kuvi-an dan nəsaan salito. Len naṽide tomaienan, lusah tuan nəsaan salit gail tabtab vapul səsəhov. Be gagai nəlol paŋpaŋ siGot epəŋas kavkav hən galito.

APol ike teris alat siYesu a Tessalonika tət̄as am

¹⁷ Be ginamit, bathudud nadəlomian, nəboŋ nəvanuan gail lotopəpehun ginamito dan gamito,

* **2:14:** Uman 17.5-6 * **2:15:** Uman 9.23, 29, 13.45, 50, 14.2, 5, 19, 17.5, 13, 18.12

lugol ehum namtogəm vi milesw, be sabəlav. Namtorin̄ gamito, avil nəlōnamit sariñ gamito. Len nələñon-masu̇-həni-an sinamit, namtohis̄i, his̄i, hən namt̄beris gamito tət̄as am.

¹⁸ Husur namtoləñon ke namt̄betəlmam van hən gamito, ale ginau, aPol, nohis̄i van ale nohis̄i tət̄as həni am, be aSetan iḡon gol ginamito.

¹⁹ Namtuke namteris gamito husur ke namtovatvat viri ke mət̄eil gəgat len aKris̄to. Namtukemkem hən gamito, mət̄osu̇man nəprais namtokade, namttoṽiv həni len nəhon aMasta sidato, aYesu, nəboñ ḡegəmai.

²⁰ Kitin, mət̄ugol namtoṽiv hən gamito, namtohəhaṽur masu̇ hən gamito.

3

¹ Nəboñ namtsatoh mai gamito, namtoləñon isa van van namtsaləboi namt̄bidan̄ ḡuri am. Imaienan namtunau ke ivoi am hən ginau mai aSilas namr̄bitoh səḡonaməru len nabiltivile Atens.*

² Ale namrosəvat aTimoti van hən gamito. ATimoti, awawa sinaməru len nadələmian, eum siGot mai ginaməru nəboñ namttokel ur na-kel-uri-an tovoi seKris̄to. Namrosəvati hən ḡigol gamit mət̄bidan̄ am, ale hən ḡigol mət̄beləñon ḡivoi am len nələmito m̄os nadələmian samito,

³ hən na-ləñon-isa-vəsa-an mət̄tokade asike ḡigol gamit ideh ḡipair dan nadələmian san. Husur gamit gabag, mət̄oləboii ke aGot itabtabuh len gidato hən dat̄bikad na-ləñon-isa-vəsa-an.

⁴ Husur, nəboñ namttotoh mai gamito, namtukel nalələgauan dan̄ir mai gamito ke nəvanuan

* **3:1:** Uman 17.15-16

gail dereh lemēdas bun gidato. Ale evisi maienan suñan mēttolēboii.

⁵ Imaienan, nēboŋ nēsalēboi nēbīdanŋ ħuri am, nosēvat aTimoti hēn ħeus kitev nadēlomian samito hēn ħelēboii. Nunau masuŵ hēni ke natēmat tēsāb nāpīsal ideh hēn asike mēttēkad nadēlomian len aKrišto am, ale nauman namttogole hēn mētbikad nadēlomian, tagēm vi ut kēmas.

⁶ Be aTimoti ivan, eris gamito, imadhatēlmam, ale ikel mai ginamēru na-kel-uri-an tovoi husur nadēlomian mai na-lēmas-buni-an samito. Ikele ke mētunau tēlmam hēn ginamito len nahēhaŵuran, ale mētolēŋon bun mētbēris ginamito suñan namttolēŋon bun namtbēris gamito.*

⁷ Imaienan, bathudud nadēlomian, namtolēŋon ivoi am len nēlonamito husur gamito. Naut kēmas nēvanuan gail lomēdas ginamit gol namtolēŋon isa vēsa, namtolēŋon ivoi am len nēlonamito husur nadēlomian samito.

⁸ Gagai namtohēhaŵur hēn nēmauran sinamit husur mētoil gēgat len Nasuḏ.

⁹ Namtuke namtesipa masuŵ vi tēban aGot tinor hēn nēsa togole mōs gamito, be nasipaan sinamit emīdol. Namtosipa hēn nakemkeman namttokade len nēhon aGot husur gamito.

¹⁰ Len nalennēyal mai nalenmariug namtusor tuŵ habat. Namtous aGot hēn namtbēris gamit tētas, hēn namtbīgol kavkav hēn nēsa tomīdol len nadēlomian samito.

¹¹ Ale aGot sidato tovi aTēmadato, mai aYesu, aMasta sidato, tēpūl pīsal hēn namtbēgēm hēn gamito.

* **3:6:** Uman 18.5

12 Nasuḅ tigol na-ləmas-buni-an samito m̄os gamit gabag mai nəvanuan p̄isi tepul səsəhov, sun̄ian na-ləmas-buni-an sinamit m̄os gamito topul səsəhov.

13 Nasuḅ tigole hən nəlomit ḅidaŋ am lan, hən asike mətḅikad nəsaan ideh len gamito, be mətḅinor kavkav len nəhon aGot, aTəmadato, nəboŋ aMasta sidato, aYesu ḅegəmai mai alat lotovi esan. Ganan.

4

Nəmauran togol aGot tohəhaṽur

1 Namtukad nahudhusoruan hən namtḅikele sal. Bathudud nadəlomian, namtukel uri tia naṽide mətḅikade m̄au hən aGot ḅehəhaṽur hən nəmauran samito. Ale nəmauran samito gagai ikad naṽide galenan. Be len nahəsan Nasuḅ, aYesu, namtous gamito, namton̄ir gamit ke, mitimagenan habat am.

2 Husur mətoləboi nakelean namttolav gail mai gamito len nahəsan Nasuḅ, aYesu.

3 Husur aGot eləŋon ke mitikad nəboruan san. Eləŋon ke asike mətugol naitian tosa ideh.

4 Eləŋon ke mitiwol hən nibemit tinor hən nəboruan san, hən nəvanuan gail ləḅeputsan gamito len nənauan salito.

5 Saləŋon ke naləŋonian hən naitian tiwol hən nibemito hum alat ləsaləboi aGot.

6 Len natenan, samtemədas nəbathudud nadəlomian ideh, husur Nasuḅ dereh tipansəm nəvanuan gail sil nəsaan galenan, hum namttokele, hum namttokel nalələgauan mai gamit a m̄o tia.

⁷ AGot eləjon ke timagenan husur gai sakis gidat hən nibedat ħiwol hən gidato taṽtaṽor, be ekis gidat hən datĸikad naĸoruan san.

⁸ Avan ideh ħemətahun naĸusanan enan, gai samətahun naĸusanan sinəvanuan ŋai, be siGot toviol hən aNunun mai gamito.

⁹ Sanor hən nəĸitos natideh husur na-ləmas-buni-an məttokade hum nəbathudud nadəlomian, bathut aGot eṽusan gamit hən məttoləmas bun gamit gabag.*

¹⁰ Evoi, mətoləmas bun nəbathudud nadəlomian ĸisi len naut a Masetonia kavkav. Naut kəmas məttomaienan, namtudaŋ ke məteləmləmas masuṽ hən galito van am.

¹¹ Mətehisi hən mətĸitoh mədau, mitigol nəsa topat len navələmit səĸomito, ale um mōs natohan samito hən navələmit səĸomito, hum namttokele hən gamit tia.

¹² Mitigol timagenan hən nəmauran samit ĸigol alat ləsəkad nadəlomian ləĸeputsan gamito len nənauan salito, ale gole hən asike mətĸipar titideh.*

Nagəmaian siNasub

¹³ Bathudud nadəlomian, nuke nisor husur nat-sua hən mətĸeləboii. Namtuke məteləboi nakitinan husur alat lotopatmari len nəmatan, hən asike

* **4:9:** Jon 13.34 * **4:12:** Len naut egai nasoruan ta Kris eləboi ĸikad namilen ideh am ke: Mitigol timagenan hən nəmauran samit ĸigol alat ləsəkad nadəlomian ləĸeputsan gamito len nənauan salito, ale gole hən asike ĸipat len avan ideh am hən ĸekətkəta təban gamito.

mæþepul hæn nalolosaan, sumñan alat læsækad nævatvat-viri-an ideh.

¹⁴ Husur datoləboii ke aYesu tomat, tole mæhat tətās; imagenan, datoləboii ke, alat lotokad nadəlomian len aYesu nəboŋ lotopatmari len nəmatan, dereh lile mæhat. Nəboŋ aYesu bægəmai, dereh aGot tilav təlmam hæn galito mai aYesu, van həni.

¹⁵ Namtukel nasoruan egai siNasuḅ mai gamito: gidato, dattomaur sal nəboŋ aYesu bətəlmam, asike datovi mæhat a m̃o len alat lotopatmari len nəmatan.

¹⁶ Husur Nasuḅ, gai dereh tevi pan dan nəmav. Dereh tikad na-kel-buni-an sua san towal habat, nadolon abiltiŋel mai nəwalan hæn nətrampet siGot. Ale alat lotokad nadəlomian len aKristo nəboŋ lotomat, dereh lile mæhat a m̃o.

¹⁷ Beti gidat, dattomaur sal, dattotoh, vəha-sua ŋai aGot tisabul gidato vi mæhat mai galito, vi lan nəmarigw, hæn datb̃ibonb̃on mai Nasuḅ len naməsav. Ŋa datitah tabtab mai Nasuḅ vi sutuai.†

¹⁸ Imagenan beti, len nasoruan enan, mitigol gamit gabag mətələŋon tivoi am len nəlomito.

5

¹ Bathudud nadəlomian, sanor hæn nəb̃itos natideh husur nəboŋ o namityal hæn natgalenan læb̃evisi.

² Husur mətələboi buni tia ke, nəboŋ siNasuḅ dereh tegəm hum nəvanuan vənvnənah togəm len mariug.*

† **4:17:** Hæn naves 15-17, ris 1Kor 15.51-52 * **5:2:** Mat 24.43; Luk 12.39; 2Pit 3.10

³ Nəboŋ nəvanuan gail ləb̃ike, “Datukad natəmat, natit p̃isi ivoi, səkad natideh b̃emədas gidato,” vəha-sua ŋai na-mədas-masũ-həni-an dereh tibar galito suñan napəŋasan hən nəpasusan togəm hən napəhaʔut totian. Ale asike, asike lugam yav dani.*

⁴ Be bathudud nadələmian, mətsatoh len nəmargobut, gol ke Nəboŋ siNasub̃ asike igol mətosəhoʔut hum nəvanuan vənvnənah togəm len mariug.

⁵ Husur gamit p̃isi mətovi anatum namial gail, anatum nalennəyal gail. Datsavi sinalenmariug, datsavi sinəmarginobut.

⁶ Imaienan, datelələgau, sadatipatmari suñan alat lototətan hən Nəboŋ enan b̃evisi. Be datehulahul, datetəgau gat gidat səb̃odato.

⁷ Husur alat lotopatmari, lupatmari len mariug, mai alat lototərog, lotərog len mariug.

⁸ Avil gidato, datovi sinalennəyal, gol ke datetəgau gat gidat səb̃odato. Datimaskətkəta gol nəlodato len nadələmian mai na-ləmas-buni-an, suñan nasoltia tokol nametəlai len nəmabun hən b̃ipat gol nəviyesyes. Datimaskətkəta gol nənauan sidato len nə-vatvat-viri-an hən nə-lav-kuvi-an dan nəsaan, suñan nasoltia toriŋ nabəhad nametəlai hən b̃ipat gol nəkadun.*

⁹ Husur aGot sətəbtəbuh len gidato hən datb̃ipanis len nab̃ilti-lol paŋpaŋ san. Ao, itəbtəbuh len gidato hən datb̃ikad nə-lav-kuvi-an dan nəsaan sidato len aMasta sidato, aYesu Kristo.

* 5:3: Jer 6.14, 8.11 * 5:8: Isa 59.17

10 AYesu imat m̄os gidato h̄en datb̄itoh h̄onb̄on maii vi sutuai, naut k̄emas datb̄ipatmari len n̄ematan o datb̄ilele sal len n̄emauran n̄eboŋ b̄et̄elmam.

11 Imaienan, mitigol m̄etel̄oŋon tivoi am len n̄elomit gabag, mitigol gamit gabag mitidaŋ am, hum m̄əttogolgole gagai.

Nakelean naməkot

12 Bathudud nad̄elomian, namtuke namtisor husur alat lotoum todaŋ t̄əban gamito, lotoil a m̄o h̄en gamito len nāvide siNasub̄, lotokel nal̄əl̄əgauan h̄en gamito h̄en asike m̄ətb̄isa. Namtous gamit h̄en m̄ətb̄eputsan galit len n̄ənanuan samito.

13 Husur nauman salito, len na-l̄emas-buni-an samito, m̄əteputsan galito len n̄ənanuan samito. Mititoh m̄ədaŋ, samtib̄al mai gamit gabag.

14 Namtoŋir gamit ke mitikel nal̄əl̄əgauan mai n̄əvanuan p̄et̄emas gail h̄en l̄əb̄eum; alat l̄əsəkad na-il-ḅuri-an, m̄ətesusupah mai galit h̄en l̄əb̄idaŋ am; m̄ətevi tarh̄ət silat l̄əsədaŋ; len n̄ə-daŋ-ḅuri-an mititoh m̄ədaŋ mai n̄əvanuan p̄isi.

15 Samtigol tisa t̄əlmam h̄en avan ideh togol tosa h̄en gamito. Be akis hisi h̄en m̄ətb̄ivoi h̄en gamit gabag mai n̄əvanuan gail p̄isi am.

16 Akis m̄ətepul h̄en nakemkeman.

17 Mitorisor tuṽ tabtab, n̄anoŋan teḅuer.

18 Naut k̄emas natideh tovisi, sipa vi t̄əban aGot h̄eni, husur enan evi nal̄əŋonian siGot m̄os gamito bathut m̄əttovi seKristo, aYesu.

19 Samtiþon gol aNunun aGot hum mættokabut gol nəhab hən ðimat.*

20 Samtemətahun nakelean hən napisulan siGot hum ləsavi natideh.

21 Be mətəbunus kitev natit þisi ke imabe. Mətetəgau gat lotovoi.

22 Be bulatut dan natideh tosa.

23 AGot, toviol hən natəmat mai gamito, tigoł mətəgəm vi esan kavkav. AGot tigoł nanunumito, nəlomito mai nibemito kavkav, linor len nəhon, nəsaan teþuer, van vəbar nagəmaian siMasta sidato, aYesu Kristo.

24 AGot tokis gamito, mətəłəboi mətberin nəlomit lan ke dereh tigoł natgalenan.

25 Bathudud nadəlomian, sor tuv nos ginamito.

26 Len naveveuan, mətesum nətarhon nəbathudud nadəlomian þisi hən mətþikel na-ke-ivoi-an sagw mai galito.

27 Len nahəsan Nasuþ, nukele hən gamito ke, mətəvurun naləbulat napisulan egai van hən galit þisi len nəbathudud nadəlomian.

28 AMasta sidato, aYesu Kristo teviol kəmas hən navoian mai gamito.

* **5:19:** Namilen ke samtigoł ke aNunun aGot saləboi þeum am, be mitidam hən þeum husur nalənonian siGot.

**Nasoruan siGot len nasoruan ta Uluveu
The New Testament in the Maskelynes language of
Uluveu, Vanuatu
Niutestamen long lanwis Maskelynes blong Uluveu,
Vanuatu.
Le Nouveau Testament dans la langue Maskelynes de
Uluveu, Vanuatu.**

copyright © 2013 Wycliffe Bible Translators, Inc.

Language: Maskelynes

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 18 Apr 2025 from source files dated 31 Aug 2023

cb9da196-fced-5a7c-9540-74db5e4270fd